

SMÁRI



Ársskýrsla Æskulýðsnefndar
Hestamannafélagsins Smára

2014

Stutt samantekt:

Æskulýðsnefndin var kjörin á aðalfundi Smára í janúar 2014. Hún tók fljótlega til starfa og skipulagði dagskrána fyrir árið. Starfið er hefðbundið að miklu leyti þar sem fastir liðir eru ávallt á dagsskrá. Mikil áhersla var lögð á nýliðun á þessi ári og skilaði það sér í mörgum nýjum meðlimum sem er mikið fagnaðarefni.

Uppsveitadeild Æskunnar fer fram í mars-apríl og skipuleggja þarf keppni og æfingar. Reiðnámskeið eru alltaf í boði og unga fólkinu er víða boðið í heimskókn. Á þessu ári fórum við í samvinnu við þrjár hestamiðstöðvar á svæðinu þar sem börn sem ekki eiga hesta gátu tekið þátt í starfinu með því að fá lánuð þæg og traust hross. Við höfum fengið mikið hrós fyrir þetta framtak hjá foreldrum og skilaði þessi tilraun mörgum nýjum meðlimum.

Einnig var Brokk og Skokk keppnin haldin í annað sinn í samvinnu við ungmennafélögin á svæðinu og tvöfaldaðist þáttakan frá fyrra ári.

Svo var ákveðið að breyta til og að halda tveggja daga sumarbúðir með útreiðum, leikjum og kennslu. 14 börn skráðu sig í þessa sumarbúðir og slógu þær rækilega í gegn!

Í Æskulýðsnefnd Smára sitja:

Meike Witt, formaður

Ragnar Sölvi Geirsson

Guðbjörg Jóhannsdóttir

Sigurður Unnar Sigurðsson

Bjarni Birgisson

Ítarleg dagskrá 2013-2014

Hautferðin 2013

Lokaverkefni síðustu æskulýðsnefndar var hin árlega hautferð. Þann 22. nóvember 2013 fengu börn og unglingar að kynnst starfsemi á hrossaræktarbúum á Suðurlandi.

Að þessu sinni var farið í Árbjæjarhjáleigu til Heklu Katarínu Kristinsdóttur og einnig til Reynis Arnar Pálmarssonar á Króki. Krakkarnir fengu að sjá gæðingana sem verið er að temja og þjálf á búunum og fengu ýmsa fróðleiksmola frá staðarhöldurum. Endað var á pizzustað á Hellu.

Reiðnámskeið, febrúar – mars

Í byrjun árs bauð Æskulýðsnefnd Smára upp á reiðnámskeið í 6 skipti í febrúar og mars í Reiðhöllinni á Flúðum. Reiðkennari var Guðrún Magnúsdóttir í Bræðratungu og fékk hún mikil lof fyrir kennsluna.

Krakkarnir mættu með sín eigin hross og var þeim skipt niður í hópa eftir getu. Tuttugu krakkar sóttu námskeiðið að þessu sinni.

Fákaselsferð, apríl



Smára, Loga og Trausta-krakkar í Fákaseli

Farið var í skemmtilega ferð í Ölfushöllina í apríl og horft á stórglæsilega sýningu Fákasels og boðið upp á pizzuveislu á eftir. Við buðum með okkur krökkum úr Hestamannafélögunum Loga og Trausta. Fyllt var heil rúta af kátum krökkum og foreldrum, samtals 57 manns!

Uppsveitadeild Æskunnar, mars – apríl - maí

Uppsveitadeild Æskunnar á nú fastan sess í mótahaldi hestamannafélaganna í uppsveitum Árnessýslu. Þar keppa félögin Logi, Smári og Trausti í þriggja-mótaröð og safna stigum bæði fyrir knapana og félögin. Mikill undirbúningur er ávallt fyrir mótaröðina og var boðið upp á æfingatíma með reiðkennara fyrir öll mótin.



Stigahæstu knapar Smára í barnaflokki í Uppsveitadeild æskunnar

Þann 8.mars hófst mótaröðin með fjórgangi unglunga og þriggangi í barnaflokki. Þann 19.apríl var svo keppt í smala í barna og unglingflokki og flugskeiði í unglingaflokki. Þar sem sá dagur datt inn á páskahelgina fengu allir keppendur páskaegg í viðurkenningaskyni. Uppsveitadeild æskunnar endaði svo þann 4.maí með fimmgangi og tölti í unglingaflokki og fjórgangi og tölti í barnaflokki.

Gaman var að sjá hve margir áhorfendur lögðu leið sína í reiðhöllina til að klappa fyrir þessum stórglæsilegu og hörkuduglegu ungu knöpum! Smári

hafnaði í öðru sæti í stigakeppni félaganna á eftir Loga. Stighæsti knapi í barnaflokk hjá Smára var Einar Águst Ingvarsson, Fjalli og í unglingaflokki Helgi Valdimar Sigurðsson, Skollagróf.

Hestheimarferð, maí

Helgarferð í Hestheima hefur verið árlegur og vinsæll viðburður og var hún fyrirhuguð 17-18.maí. Hvort það var dagsetningin eða aðrir viðburðir sem settu strik í reikninginn þá var skráningin það dræm að við þurftum að aflýsa henni. Stefnt er á að auglýsa ferðina aftur næsta vor enda hefur félögum fjölgað mjög í lok sumars og gerum við okkur vonir um að þeir muni skila sér í næstu Hestheimaferð.

Sumarnámskeið, júní

Á þessu ári vorum við búin að setja okkur það markmið að efla nýliðun og fjölga félögum. Við fengum með okkur í lið þrjár hestamiðstöðvar á svæðinu og buðum upp á þrjú þriggja daga námskeið í júní þar sem allt var útvegað: Reiðkennsla framkvæmd af menntuðum reiðkennara, rólegir og þægir hestar, reiðtygi og hjálmar. Hestamiðstöðvarnar voru samstarfsfúsar og buðu upp á allt þetta á mjög góðu verði (7.000-10.000 kr á barn). Námskeiðin voru haldin 5-7 júní í Vestra-Geldingaholti, 9-11 júní á Húsatóftum og 12-14 júní í Syðra-Langholti.

Upppantað var á öll þrjú námskeiðin og meðlimum hestamannafélagsins fjölgaði þar sem um það bil 40 börn tóku þátt og þó nokkur börn fóru á fleiri en eitt námskeið.

Heimsmeistarakeppnin í Brokk og Skokk, júní

Í annað sinn þetta sumar þann 22.júní hélt Hestamannafélagið Smári í samvinnu við ungmennafélögin á svæðinu keppni í Brokk og Skokk í Skaftholtsréttum í Skeiða- og Gnúpverjahreppi.

Sú keppni er að upplagi hugmynd sem fæddist innan Æskulýðsnefndar Smára og var haldin í fyrsta sinn í fyrra og sló rækilega í gegn.

Keppt var í tveimur flokkum, í barna-og fjölskylduflokki annarsvegar og í íþróttaflokki hins vegar. Fjölskylduhringurinn er tveggja kílómetra langur en íþróttahringurinn ríflega sex kílómetrar.

Brokk og Skokk gengur út á það að sett er saman lið með einum hesti og tveimur knöpum. Knapar skiptast á að vera á hestbaki og hlaupa á milli skiptistöðva sem settar eru upp með ákveðnu millibili. Hér skiptir taktík miklu máli og þurfa keppendur að skipuleggja sig vel til þess að ná sem bestum árangri. Í fjölskylduhring er heimilt að teyma undir börnum yngri en 8 ára allan hringinn. Í íþróttahringnum voru fimm skiptistöðvar og var skylt að skipta um knapa á að minnsta kosti fjórum þeirra.



Einbeiting skín úr augum keppanda í Brokk og skokk

Á þessu ári fjölgaði keppendum um næstum 100% og fleiri voru skráðir en boðuðu forföll vegna heyanna. Samt sem áður tóku 13 lið þátt í þessari skemmtilegu keppni og við segjum með stolti frá því að yngstu knapar voru á leikskólaaldri og elsti þáttakandinn er orðin langamma!

Heimsmeistarar í Brokk og skokk 2014 eru:

Í fjölskylduflokki, Baldur Már Jónsson, Jón Hákonarson og Glampi frá Ásum. Í íþróttaflokki, Lára Bjarnadóttir, Gunnlaugur Bjarnason og Aron frá Stekkum.

Að keppninni lokinni var öllum keppendum og hjálparliði boðið upp á grillaðar pylsur og kókómjólk.

Frá byrjun hefur ávallt verið lagt mikið kapp á að tryggja öryggi knapa og hesta og hefur Landstólpi ehf. útvegað gul öryggisvesti bæði fyrir keppendur og hjálparlið. Keppendur og hjálparlið fengu að eiga vestin til einkaafnota eftir keppni. Björgunarsveitirnar á svæðinu voru fengnar til að loka veginum á meðan á keppninni stóð.

Öll félög sem að keppninni standa eru sammála um að þessi keppni er komin til að vera og verður aftur haldin um jónsmessuleytið 2015 í Skaftholtsréttum. Myndir segja meira en 1000 orð og bendum við hér með á fésbókarsíðu Brokk og Skokk :

<https://www.facebook.com/groups/567062360068945/>

og á tvö skemmtileg myndbönd af keppninni á youtube.com.

<http://www.youtube.com/watch?v=BaVRJQafIOA>

<http://www.youtube.com/watch?v=oF8YljWfMQs>

Eins og með sumarnámskeiðin þá hefur þessi keppni skilað okkur mörgum nýjum áhugasömum á starfi hestamannafélagsins Smára.

Landsmót, júlí

Fyrir Landsmót bauð æskulýðsnefndin öllum knöpum upp á tíma með þjálfara fyrir keppnina. Ungu Smárakeppendurnir stóðu sig glæsilega á Landsmótinu.

Í barnaflokki kepptu Aron Ernir Ragnarsson og Draumur frá Holtsmúla 1 og hlutu 8,14 í einkunn. Þorvaldur Logi Einarsson og Brúður frá Syðra-Skörðugili fóru áfram í milliriðil og hlutu 8,31 í einkunn.

Í unglingaflokki kepptu Helgi Valdimar Sigurðsson og Hugnir frá Skollagróf og hlutu 8,04 í einkunn. Hrafnhildur Magnúsdóttir og Eyvör frá

Blesastöðum hlutu 8,37 í einkunn og voru hársbreidd frá því að komast í milliriðil.

Í ungmennaflokki kepptu Eiríkur Arnarsson og Reinn frá Rútsstaða-Norðurkoti og hlutu slétta 8 í einkunn. Guðjón Örn Sigurðsson og Gola frá Skollagróf hlutu 8,22 í einkunn. Sigurbjörg Bára Björnsdóttir og Blossi frá Vorsabæ II komust í milliriðla og þaðan upp í B-úrslit og hlutu einkunn þar 8,40.

Sumarbúðir Smára, ágúst

Síðustu árin hefur verið dræm aðsókn að æskulýðsdegi og fjölskylduútreiðartúr. Við tókum þess vegna þá ákvörðun að breyta aðeins til og blésum til sumarbúða Smára sem haldnar voru í í Syðra-Langholti 13-14. ágúst. Fjórtán kátir krakkar mættu, að hluta til með eigin hross og að hluta til með lánshross frá Syðra-Langholti. Dagskráin var þéttskipuð, bókleg og verkleg kennsla, leikir og útreiðtúrar voru á dagskrá og góður og ljúffengur matur framreiddur af staðarhöldurum í Syðra-Langholti. Mikil ánægja var með helgina og höfum við fengið fjölda áskorana frá börnum og foreldrum um að halda aftur svona sumarbúðir.



Kátur hópur í sumarbúðum Smára að Syðra-Langholti

Fræðsluerindi, október

Þriðja október hélt Guðríður Eva Þórarinsdóttir dýralæknir fræðsluerindi fyrir krakkana í fundarsal reiðhallarinnar á Flúðum og var stofnað til spurningaleiks upp úr erindinu á eftir. Aðgangur var ókeypis og léttar veitingar voru í boði hestamannafélagsins á eftir.

Haustferð, nóvember

Starfsári æskulýðsnefndar lýkur svo með árlegri haustferð okkar í nóvember en stefnt er að því að þessu sinni að heimsækja tvö hrossaræktarþú í Flóanum og borða saman á eftir.

Hefðbundið mótahald

Vert að geta þess að hefðbundið mótahald hestamannafélagsins er í miklum blóma. Keppt er í barna, unglinga og ungmennaflokkum á mótum sem haldin eru án beinnar aðkomu æskulýðsnefndar. Þar má nefna vetrarmótaröðina, töltmótið í apríl, firmakeppnina 1. maí, úrtöku fyrir landsmót og gæðingamót Smára í júlí.



Sigurvegarar unglingaflokks í firmakeppni Smára

Samskipti

Skemmtilegt er að taka fram að allir sem sitja í æskulýðsnefnd Smára gefa áfram kost á sér og er stefnt að svipaðri dagskrá á næsta ári. Mikil áhersla hefur verið lögð á góð samskipti við krakkana og foreldra þeirra og var stofnaður til þess lokaður fésbókarhópur þar sem við tilkynnum viðburði og sýnum myndir af starfinu. Einnig höfum við notfært okkur Mentorkerfi grunnskólanna til að senda út tilkynningar til foreldra. Þetta hefur gengið mjög vel og við getum sagt frá því með stolti að núna hafa skráð sig börn í félagið sem búa í öðrum sveitafélögum bara vegna þess góða æskulýðsstarfs sem stundað er í hestamannafélaginu Smára.

Þökkum starfsfólki LH kærlega fyrir gott samstarf á liðnu ári!

*Bestu kveðjur,
Æskulýðsnefnd Smára
Gugga, Raggi, Bjarni, Sussi og Meike*